

**Tomqab ntawd yim hnuv cov thwjtim rov qab tuaj nyob ua ke hauv tsev. Zaum no Thaumias nrog lawv nyob ntawd. Lawv twb xauv qhovrooj zoo zoo lawm, tiamsis Yexus cia li los sawv hauv lawv nruab nrab.**

Yexus hais rau Thaumias hais tias, koj cia li cev koj tus ntv tes los xuas kuv lub xibteg thiab cev koj txhais tes xuas lub qhov ntawm kuv sab tav. Koj tsis txhob ua xyemxyav, koj cia li ntseeg tamsim no. Thaumias teb Yexus hais tias, koj yog kuv tus Tswv, thiab yog kuv tus Vajtswv.

**Yexus hais rau Thaumias hais tias, koj pom kuv koj thiaj ntseeg los? Tus uas tsis tau pom kuv, tiamsis nws ntseeg tus ntawd tau koobhmoov. (Yauhas 20:19, 20, 26-29)**

Kuv yog tus uas muaj sia zees nyob, kuv twb tuag lawm, tiamsis koj sim saib nimno kuv muaj sia zees nyob mus ib txhis li. Kuv yog tus kav txojkev tuag thiab Tubtuag teb. (Tshwm sim 1:18)

## 375

### **VAJTSWV TUS NTSUJ PLIG YUAV LOS QHIA NEEG**

Kuv yuav pub kuv tus ntsujplig rau txhua leej neeg. Nej tej tub, tej ntshais yuav cev kuv tej lus. Cov neeg laus yuav ua npausuav, nej tej neeg hluas yuav ua yogtoog.....

**Thaum txog tiam ntawd kuv yuav pub kuv tus ntsujplig rau nej tej tubmab tubqhe, tsis hais pojniam txivneej huv tibi thiab. (Yau-ees 2:28-29)**

Kuv yuav thov kuv Txiv, thiab kuv Txiv yuav txib dua ib tug los pab nej, nws yuav nrog nej nyob mus ib txhis.

**Tus ntawd yog Vajtswv tus ntsujplig uas yuav qhia qhovtseeb rau nej. Neeg ntiajteb yuav ua li cas paub lees yuav nws, rau qhov lawv tsis pom nws thiab tsis paub nws. Tiamsis nej paub nws rau qhov nimno nws nrog nej nyob, thiab nws yuav nyob hauv nej lub siab.**

Kuv yuav tsis tso nej ua ntsuag ib zaug li. Kuv yuav rov qab los cuag nej. Tshuav tsis ntev neeg ntiajteb yuav tsis pom kuv lawm, tiamsis nej yuav pom kuv. Nej yuav muaj sia nyob rau qhov kuv muaj sia nyob.

**Thaum txog hnuv ntawd nej yuav paub hais tias, kuv nrog kuv Txiv koom ib txogsia thiab nej nrog kuv koom ib txogsia ib yam li kuv nrog nej koom ib txogsia.**

Tus uas paub kuv tej lus thiab ua raws li, tus ntawd yog tus uas nloog kuv lus. Kuv txiv yuav hlub tus uas nloog kuv lus. Kuv yuav hlub tus ntawd thiab qhib tus ntawd lub qhov muag kom nws pom kuv.

**Tus Yudas uas tsis yog Yudas Ikhalaus nws nug Yexus hais tias, xibhwb ua cas koj yuav cia peb pom koj xwb, koj ho tsis pub neeg ntiajteb pom koj.**

Yexus teb hais tias, tus uas nloog kuv lus tus ntawd yeej yuav ua raws li kuv hais. Kuv txiv yuav hlub tus ntawd kuv txiv wb yuav los cuag nws thiab nrog nws nyob.